

Bouônjour, ch'est mé Peter Germain tchi vos pâle à matîn.

J'ai justément 'té en Améthique pour trais s'maines. J'tais à rester avec un anmîn dé St Martîn, il acatit chute maïson ichîn y'a trente ans. Ch'est sus eune île tchi s'appelle "Marco Island" en Floride.

Tu pâles qué ch' tait bé ichîn, tout pliein d'solé du matîn au sé! Pouor c'menchi jé tchittînmes la maïson à chîntch' heuthes au matîn pour prendre l'avion à Londre à sept heuthes. Pouor un change, j'tais dé bouonne heuthe, et j'arrivînmes auprès vîngt-quat' minnutes!

Car jé n'peux pon marchi, j'avais bésoïn d'eune tchaïse pour m'emmener dé l'avion jusqu'au salon! Ch'est râvisant combeïn liain tch'i' faut aller. J'avais bésoïn d'arrêter quat' heuthes d'avant not' préchain vol pour l'Améthique. J'arrêtitînmes pour un gâs pour nos emmener à l'avion, mais auprès plusieurs demandes i' n'arrivit pon. Enfin il arrivit, tard!!! Et nos emmenit dans un cârrosse à travers plusieurs tunnels souos tère à grand' vitesse. À maîntchi c'mîn, il arrêtit et téléphonit à tchitch'un pour dithe qué j'sommes tard.

J'arrivînmes à l'avion justément d'avant qu'i' freunmîtent la porte! Dieu merci!! J'm'installis dans ma tchaïse, ch'tait mangnifique, car, par pousser (en poussant) des boutons tu peux changi ta tchaïse en un liet!!! Auprés neuf heuthes et des mangnifiques èrpas, j'arrivînmes à Miami. Acouo eune fais j'avais bésoïn d'eune tchaïse, mais chute fais, j'fus transporté dé l'avion dans un train à travers des 'milles' dé pâssages!!! Et quand j'arrivînmes à l'ascenseur , i' pouvait prendre qu'eune tchaïse!!!! Et y'avait eune douzaine dé nous, tchi "pêque-mêle"!! Et quand j'arrivînmes à la porte dé contrôle, i' mé d'mandîtent pouortchi qu'j'avais un passeport d'Angliétère quand j'habite en Jèrri. J'explitchis qué ch'tait pon Nouvelle Jèrri, mais i'n' tait pon content avec mén explicâtion et d'mandit à san supérieur dé v'nîn vaie. Quand i' réalisit tch' il' avait fait eune foutaise i' tait si mârri, tch'i' d'mandit dé prendre eune împression dé touos mes dés!!!

Enfin nouos v'chîn en route, avec man anmîn Tony (lé fis dé Richard Norman, si y' a tchitch'un tchi l'connaît. Auprés quâsiment trais heuthes en route j'arrivînmes à la maïson, foutu et prêt pour man liet.

Lé préchain jour, j'tais tout prêt pour mes vacances. J'feûnmes pour eune touônnee, les routes sont si larges avec trais ou quat' c'mîns, mais pas comme siez nous, les siens tchi veulent cachi douôchement prannent lé bord du fôssé et les siens tchi veulent aller vite prannent lé centre. Ichîn i' prannent éyou tch'i' veulent!!! Dieu merci qué j'tais pon à cachi.

Ch'est quand tu'as l'temps dé relaxer, qu'tu trouves la bouonne santé.

L'année pâssée j'fus en Angliètère pour visiter man bieu-fréthe et ma belle-soeu. I' d'meurent près d'Lincoln. Un jour Mick m'emmenit siez un anmîn tch'est un fèrmyi. Sa fèrme 'tait aussi grande qué not' pâraisse!! Et, si i'y' avait eune entrée dans un clios près d' la route, i' fut oblyigi d' faithe eune tranchie pour empêchi des vaituthes d'entrer dans sa fèrme et voler des tracteurs ou machinnes. Et d'avant longtemps i' sont sus un baté en route pour l'Ûrope!!!

Auprés chennechîn j'feûnmes à vaie les vaques. Pus qu' chîn chents!! Dans lus ouothelles y'avait un mio d'plastique, tchi 'tait un transmetteur. Y'avait qu' trais gâs en chèrge. Les vaques peuvent entrer dans lus stâle quand i' veulent. Lé compiuteux décide si ch'est l'temps d' les traithe! Si ch'n' est pon, la hèche ouvre et i' sortent, mais si ch'est l'temps pour traithe, i' sont donné tchiquechose à mangi. Lus piéchôts sont lavés automatiquement et i' trouve les trans. Et i' met les tâsses en pliaiche sans pèrsonne à les touchi. Lé lait est 'testé' et si ch'est bouôn i'pâsse pour être vendu, autrement ch'est donné ès autres animaux sus la fèrme.

Jé m'rappelle bein quand j'tais mousse, aller au clios pour èrmuer les vaques avec un maillot, haler l'paison et marchi deux'trais pas, pour taper l' paison en pliaiche. Au sé, râmasser les vaques, et les emmener siez nous à l'êtabl'ye prêtes pour traithe. Mettre lé lait dans des cannes et auprès dans l'ieau fraide.

Le préchain matîn i' fallait mettre les cannes sus la route pour être collectées, par "Joe" dé Fairview Dairy!!! Tchi tripôt! La s'maine pâssée, d'avant siêx heuthes au matîn, j'fus à vaie lé solé levant, pour Pâques. Y'avait eune trentaine dé nous en haut d'un côtil à Bel Va. Auprés lé p'tit sèrvice j'entrînmes pour eune tâssée et des mèrvelles. Tandis qué j'tais là, j'acatis des nouvelles patates. Tu pâles qu'il' avaient un bouôn goût!!!

Ch'est tout pour achteu m's anmîns, À la préchain.